

# Filemon

## Te launiu Pol e taataa iaa

### Filemon

**Na hakataakoto hakamattua i roto te launiu nei:**

Te tattara kaamata *1.1—1.3*

Pol e tattara hihia ake Filemon *1.4—1.7*

Pol e kainno ake Filemon ki hai aroha ake Onesimus *1.8—1.22*

Tattara hakaoti *1.23—1.25*

<sup>1</sup> Anau Pol, anau e karapusi ria i te vahi Jisas Krai, tena maaua ma Timoti te taina taatou raa e tattaa atu,

iaa akoe Filemon te taina maaua tera e hehekau hoki peenei ma maaua nei <sup>2</sup> ia ma na tama te lotu tera e kutukutu i roto te hare akoe raa, tena Afia te kave taatou raa ia ma Arkipus te tama hehekau hoki peenei ma maaua nei raa.

<sup>3</sup> TeAtua taatou Tamana ia ma TeAriki Jisas Krai ki hai aroha kootou, tena ku rorohi hakatauareka kootou ki nnoho laoi.

#### *Te laoi ia ma te hakatina Filemon*

<sup>4</sup> Filemon taku taina, na saaita hakaatoa anau e lotu raa, anau e maanatu tahi akoe, tena anau e hakammaha TeAtua anau raa, <sup>5</sup> maitaname anau e rono pera ma akoe e hakatina i TeAriki Jisas, tena ki laoi na tama e ttapu TeAtua raa hakaatoa.

<sup>6</sup> Tena anau e lotu ake pera ma te huhukkui maatou ma na tama te lotu raa e me ki kou atu te atamai hakamaoni ia ma na hoki hakaatoa tera maatou e isi i te huhukkui maatou ma Krai raa.

<sup>7</sup> Taku taina, te laoi akoe raa e kou mai anau te

hihia e rahi ia ma te tauareka hakamaoni! Akoe e hakahihia roo na hatumanava na tama TeAtua raa hakaatoa.

*Too hakaraoi Onesimus*

<sup>8</sup> Tera hea anau se matakū roo te tattara atu pera ma he taina akoe i te vahi Krai ki ppena hea akoe e tau te ppena raa. <sup>9</sup> Maitaname anau e laoi akoe, tena anau ku kainno atu akoe. Niaina ma anau ko Pol te tama hehekau ma Jisas Krai tera e karapusi ria te saaita nei e mee anau e hehekau ma Tama raa. <sup>10</sup> Tena anau e kainno atu akoe i te vahi Onesimus, te tamariki anau i te vahi Krai raa; e mee te saaita anau ni noho i roto te hare karapusi raa, anau e mee pera ma he tamana aia i te vahi te lotu. <sup>11</sup> I mua raa aia he tama vare koi, e meia te saaita nei aia he tama roo hakamaoni e lavaa te tokonaki taaua.

<sup>12</sup> Anau e laoi mahi roo aia, tena anau e me ki kauna ria atu te tama nei vahao nei. <sup>13</sup> Anau e hihai roo ma aia ki nnoho maaua i te kina nei, te saaita nei anau koi noho i roto te hare karapusi e mee te Rono Tauareka raa ma ki lavaa aia te sui te sao akoe no tokonaki anau. <sup>14</sup> Anau se hihai ma ki meatu akoe ki tokonaki anau, tena anau e hihai ma akoe ki ppena hea akoe e hihai raa. Ia tena anau se lavaa te ppena he mee kame akoe se hihai.

<sup>15</sup> Onesimus kame ni noho i taha ma akoe paa saaita koi, ia tena te saaita nei akoe ku lavaa te too aia ki nnoho tahi koorua. <sup>16</sup> Tena te saaita nei aia ku se mee koi pera ma he tama hehekau, e meia aia ku raka hoki ma na tama hehekau raa, ia he taina hakamaoni taatou i te vahi Krai. Te kkira anau raa aia he tama hakamaoni roo!

Tena akoe hoki e me ki kite te hakamaoni te tama hehekau ia ma te taina akoe i te vahi TeAriki nei.

<sup>17</sup> Tena kame akoe e maanatu pera ma anau he hakahoa akoe, tena akoe ku too hakaraoi te tama nei i te vahi anau. <sup>18</sup> Kame aia ni ppena he mee e sara i akoe, ia ni taoni he mee i akoe, tena akoe ku hakammau na taoni naa i te inoa anau.

<sup>19</sup> Anau Pol e taataa na mee nei ma te rima anau: *Anau Pol e me ki sui muri atu.* (Anau se hihai ki meatu hoki pera ma akoe e taoni anau ma te ora akoe.) <sup>20</sup> Ia tena taku taina, taaua ni hai taina i te vahi TeAriki, tena akoe ku ppena hea anau e hihai ki mee anau ki hihia.

<sup>21</sup> Anau e iroa pera ma te saaita anau e taataa atu te launiu nei raa, akoe e me ki pena hea anau e hihai. Emeia anau e iroa hakamaoni roo pera ma akoe e me ki ppena alaa mee hoki e Ilahi.

<sup>22</sup> Teeraa mee hoki, tanattana mai he kina ma anau ki moe, maitaname anau e iroa pera ma TeAtua e me ki kou mai hea taatou ni kainno ake Aia ma ki kauna ria atu anau ki vaakai atu i kootou raa.

### *Na tattara hakaoti*

<sup>23</sup> Epafra, te tama e ponotia i te hare karapusi ma anau i te vahi Jisas Krai raa e kou atu hoki na tattara hihhia aia, <sup>24</sup> tena Mak, Aristarkus, Demas ia ma Luk e kou atu hoki na tattara hihhia laatou.

<sup>25</sup> Te noho laoi TeAriki Jisas Krai ki nnoho ma kootou hakaatoa.

**Nukumanu**  
**Nukumanu: Nukumanu (Old Testament)**  
**Olpela Testamen long tokples Nukumanu long**  
**Niugini**

copyright © 2020 Wycliffe Bible Translators, Inc.

Language: Nukumanu

Contributor: Wycliffe Bible Translators, Inc.

All rights reserved.

2022-08-19

---

PDF generated using Haiola and XeLaTeX on 11 Nov 2022 from source  
files dated 29 Jan 2022

54439682-f8e2-586d-98e1-295d02f74287